

Prosjekt- og aktivitetstilskot 2019

Radøy kommune har gjort endringar i tildeling av prosjekt- og aktivitetstilskot frå kulturmidlane. Tidlegare vart kvar søknad vurdert og handsama fortløpande. I år vert midlane fordelt to gonger i året. Det er 30.000 kroner til fordeling i begge søknadsrundane.

Kommunale kulturmidlar kan gjevast til lag, foreiningar og organisasjonar som har sitt virke i Radøy kommune. Regionale organisasjonar og fylkesorganisasjonar kan få tilskot dersom midlane vert øyremerkt verksemd i Radøy kommune, og det ikkje finst lag i kommunen som ivaretar denne aktiviteten. Det er då ein føresetnad at organisasjonen har medlemmer som er busette i Radøy kommune.

Tilskot kan gjevast til opne kulturarrangement og –prosjekt, og til innkjøp av utstyr. Arrangement og prosjekt som er nyskapande vert prioriterte. Tilskotet er behovsprøvd og kan gjevast som:

- Underskotsgaranti
- Direkte tilskot

Retningslinene seier at aktivitetar for barn og unge vert prioriterte. I tillegg skal aktivitetar som femnar om menneske med nedsett funksjonsevne og tiltak som fremjar integrering prioriterast.

Tilskot til prosjekt- og aktivitetsstøtte har vore kunngjort i fellesannonse i Strilen og på kommunen si heimeside. Det er kome inn åtte søknader.

Desse har søkt om tilskot

Nordhordland Sykkelklubb skal i slutten av juni arrangera master-NM (veteran-NM) for landevegssykling. Sykkelklubben søker Radøy kommune om tilskot frå kulturmidlane til arrangementet.

Temporittet i meisterskapet er lagt til Austrheim/Radøy – med start ved Austrheim samfunnshus og mål på Soltveit. Fellesstarten går i rundløype Alversund-Erstadjellet-Seim-Vollom-Alversund.

Veteran-NM er det største enkeltarrangementet som Nordhordland sykkelklubb nokon gong har gjennomført. Arrangøren har eit budsjett med utgifter på kr 185.000,-. Basert på rundt 300 deltakarar og forventa sponsorinntekter, kan inntektssida koma opp i 210.000 kroner.

Nordhordland sykkelklubb har i ei årrekke arrangert Nordhordland Rundt, som er eit av dei største turritta i Hordaland. Sjølv om sykkelklubben gjer det meste av arrangementet på dugnad, er det ei rekke kostnader knytt til eit sykkel-NM for veteranar. Fleire lokale samarbeidspartnarar vil få dugnadsinntekter jobben dei gjer.

Nordhordland Sykkelklubb har om lag 200 medlemmar, dei aller fleste er frå Lindås, Meland og Radøy. Eitt av arrangementa er lagt til Radøy. Det er ikkje eigen sykkelklubb i kommunen, men ein god del av medlemmane er busette i Radøy.

Rådmannen sitt framlegg til vedtak:

Det vert gjeve eit tilskot på 7000 kroner.

Hordabø minikantori har arrangert familiekonsernt saman med artisten og barnesongskrivaren Bjarte Leithaug i Hordabø kyrkje. Det vert søkt om tilskot på 8500 kroner til å dekkja honorar til artist og til lys og lyd.

Koret har i finansieringsplanen ført opp 12.500 kroner i utgifter i samband med konserten, og 4000 kroner i inntekter i kollekt ved utgangen.

Prosjektet det vert søkt om tilskot til, ligg innanfor retningslinene for tildeling, der aktivitetar for barn og unge er prioriterte.

Rådmannen sitt framlegg til vedtak:

Det vert tilrådd ei løyving på kr 4000,-.

Eikanger Bjørsvik Musikklag har søkt om støtte til deltaking i Europameisterskapet for Brass Band 2019 i Montreux. Korpset viser i søknaden til eit finansieringsbehov på ca 580 000 kroner for dei 30 musikanane.

EBML søkjer om eit bidrag på kr 6000,-.

Utfrå regelverket fell denne søknaden utanfor vedtekne kriterier. Søknaden gjeld eit korps utanfor kommunen, og Radøy har sjølv eit sterkt korpsmiljø. Eikanger Bjørsvik Musikklag har heller ikkje utøvarar som er busette i Radøy.

Rådmannen sitt framlegg til vedtak:

Søknaden vert avslegen.

Manger skulemusikklag ønskjer å profilera seg når skulekorpset er på reiser og konkurransar. For å visa tydeleg kven dei er og kvar dei kjem frå, vil dei kjøpa T-skjorter (med trykk) til senior- og juniorkorpset. søkjer om tilskot til innkjøp av T-skjorter til musikantane.

I følgje søknaden vil dette kosta ca 20 000 kroner, og det vert søkt om 20 000 kroner i tilskot.

Det er fint at Manger skulemusikklag vil marknadsføra kommunen på denne måten, og skulekorpsa våre er gode ambassadørar.

Rådmannen sitt framlegg til vedtak:

Det vert gjeve eit tilskot på kr 5000,-.

Hordabø skulemusikklag fyller 50 år i 2019. Dette vert feira med jubileumsshow – «ABBA retro» og jubileumsfest i Hordabøhallen.

Skulekorpset har søkt om 20.000 kroner i prosjekt- og aktivitetsstøtte for jubileumsshowet. I søknaden vert det peika på at eit tilskot vil sikra at jubileumsarrangementet ikkje går ut over den daglege drifta av korpset økonomisk.

Hordabø skulemusikklag har hatt ein serie flotte show, saman med band og solistar, og set opp eit nytt show i samband med jubileumsfeiringa.

Korpset har ein finansieringsplan som viser utgifter på kr 50 000,- der lys/lyd (20 000) og seminar/instruksjonskostnader (16 000) er dei største kostnadane. Inntektene er stipulert til 30 000 kroner.

Korpset skriv i søknaden at kommunalt tilskot skal sikra at jubileums-arrangementet ikkje går utover den daglege drifta av korpset økonomisk.

Hordabø skulemusikklag har fått kommunalt tilskot til denne type showproduksjon tidlegare. Dette er eit tilbod til barn og unge, og som også er eit samarbeid på tvers av generasjonar.

Rådmannen sitt framlegg til vedtak:

Det vert gjeve eit tilskot på kr 7000,-.

Nordhordland Turlag og skulane samarbeidar om Opptur for elevane i 8. klasse. Denne dagen får elevane ein prøvesmak på friluftsliv, uavhengig av tidlegare erfaring med fysisk aktivitet. Målet er å få fleire ungdomar til å oppleve glede ved friluftslivet.

DNT sentralt og Bergen og Hordaland Turlag går til saman inn med 50 000 kroner til Opptur. Nordhordland Turlag ber kommunane dekke transportkostnadane med buss til turmålet, som vil kosta 44.000 kroner for elevane tilsaman. I vårt tilfelle vil bussane henta elevane på Radøy.

Turlaget har søkt Radøy kommune om kr 7500,- i transporttilskot i samband med Opptur.

Opptur er eit fint tiltak for unge, og med god folkehelse-profil. Men med mange søknader og ein avgrensa pott til fordeling, meiner administrasjonen det ikkje vil vera rett å prioritera kommunale kulturmidlar til bruk av transport av elevar i skuletida, og i denne samanheng også til eit arrangement utanfor kommunen.

Rådmannen sitt framlegg til vedtak:

Søknaden vert avslegen.

Nordhordland Turlag skal arrangera «Midsommarnatt-tur». Turlaget kallar det ein «merkevaretur» Radøy på langs. Starten går ved Hilland-feltet kl. 21.30 om kvelden og turfølgjet skal etter planen vera framme på Rossnes kl. 08.30, med felles frukost i kaiområdet. Turen er open for alle og vert vert moglegheit til å vera med på ein korttur undervegs.

Nordhordland Turlag søker om 10 000 kroner i støtte i prosjekt- og aktivitetsstøtte, øyremerkt til busstransport frå Rossnes og tilbake til Hilland etter avslutta tur, og til marknadsføring av «midsommarnatt»-turen.

Rådmannen ser dette som eit spennande prosjekt i friluftslivet og folkehelsa si teikn, som vil vera god marknadsføring for kommunen. Prosjektet kan også omtalast som nyskapande.

Rådmannen sitt framlegg til vedtak:

Det vert gjeve kr 2000,- i tilskot

Radøy sogelag gav i 2011 ut boka «Krigsår på Radøy». Boka vart trykt i 1000 eksemplar, men vart fort utseld. No vil sogelaget trykkja boka i nytt opplag (600 eks) og søker om kr 20 000,- i tilskot til bokprosjektet. Samla kostnadsramme for nytt opplegg er på kr 47 813,-.

I søknaden skriv sogelaget at dei vil gje 100 eks. som klassesett i gåve til kvart av skulane i kommunen til bruk i undervisninga. Resten av opplaget vert lagt ut for sal til same pris som sist – kr 200,-.

Sogelaget viser til at laget har fått ein del førespurnader om kvar ein kan få tak i boka. Det er viktig at også komande generasjonar vert kjende med krigshistoria på Radøy. Sogelaget har gjort ein god jobb med å ta vare både på lokal krigshistorie og anna historisk matriale, som elles gjerne ville gått i gløyme boka. Sogelaget fekk kommunal støtte til utgjevinga av boka «Krigsår i Radøy».

Rådmannen sitt framlegg til vedtak:

Det vert gjeve kr 5000,- i tilskot.

Sogelaga i Radøy, Meland og Lindås, og Lyngheisenteret, har gått saman om å få bygt ein kopi av Austfjordbåten ved Hardanger fartyvernssenter. Prosjektet er kostnadsrekna til kr 658 250,-, og det er søkt om eit tilskot på 25 000 kroner.

Originalen av Austfjordbåten er frå 1890. Byggjeskikken er typisk for Nordhordland, og i følge er båten meint å vera ein representasjonsbåt for Alver kommune og bruksbåt i undervisningsopplegg for skulane.

Lynghesenteret skal administrera bruken av båten i heile Alver kommune. I søknaden vert det peika på at ein klinkbygd trebåt frå Nordhordland har stor lokalhistorisk verdi for framtida.

Det er prisverdig at fleire lag går saman om å realisera dette båtprosjektet, som har historisk verdi for bygdene våre. Dette er eit prosjekt som Alver kommune bør vurdere å støtta opp om.

Rådmannen sitt framlegg til vedtak:

Søknaden vert avslegen.

Rådmannen sitt framlegg til vedtak:

Følgjande søkjarar får tildelt prosjekt- og aktivitetsstøtte:

- Nordhordland sykkelklubb	sykkel-NM for veteranar	kr 7000,-
- Hordabø minikantori	konsert m/Bjarte Leithaug	kr 4000,-
- Manger skulemusikklag	T-skjorter m/trykk	kr 5000,-
- Hordabø skulemusikklag	jubileumsshow	kr 7000,-
- Nordhordland turlag	«Midtsommarnatt-tur»	kr 2000,-
- Radøy sogelag	nytt opplag «Krigsår på Radøy»	kr 5000,-

Følgjande søknader vert avslegne:

Nordhordland Turlag	transport elevar Opptur
Sogelaga i Radøy, Meland,	
Lindås og Lynghesenteret	kopi av Austfjordbåten